

太上洞淵三昧神咒齋十方懺儀
廣成先生杜光庭刪定

東方

臣等謹為齋主某甲等 修建 洞淵三昧神咒大齋 行道禮懺
救禳災疾 卻禍祈恩 伏願 太上垂慈 諸天愍育 敕下十方主者
大梵天王 殺鬼吏兵 祛災力士 齊臨法席 俱到道場 為齋主
收逐魔精 驅斥鬼祟 勾盈子等徒侶 所行眾災 速賜剪除 匡持
齋主百病除愈 千殃蕩消 增續年齡 超騰祿位 九玄昇度 七祖逍
遙 合宅安貞 良賤康泰 得如所願 仰荷玄恩

咒曰

東方蒼老君 號曰勾芒靈 梵汝遊太空 蒼蒼拂玉京
大乘總三天 眾真統魔兵 八音遍十地 九龍雲輿迎
建齋立大功 長夜自光明 正道法鼓振 百邪悉摧傾
魔王來稽首 敢試滅其形 善神擁門戶 力士交萬靈
道氣廣流布 家親咸安寧 疫毒皆消盡 萬民悉長生
相與弘至道 俱遊紫鳳城

太上洞淵三昧神咒齋十方懺儀

清微藏書閣

南方

臣等謹為齋主某甲等 修建 洞淵三昧神咒大齋 行道禮懺
救治災疾 請福祈恩 伏願 大聖弘慈 眾真垂祐 遣天丁力士
赤殺天兵 收逐魔瘟 滅卻焦氏九子等眾 所行災疾 一切凶殃
並願攝毒收精 各還方位 當使齋主等 疾患痊愈 魂魄清安 算
壽增延 祿位超進 先亡往逝 免脫幽途 合宅安康 良賤貞吉
得如所願 仰荷玄恩

咒曰

南方炎帝君 八表號閭浮 飛軒駕雲輿 十直三天遊
玉女乘霄唱 金光溢丹丘 今日轉法輪 梵響振九嶠
天魔敕魔兵 風舉自然休 晃晃三光暉 百邪歿九幽
敢有干試者 力士斬其頭 諸天帝王子 殺鬼氣不流
故有強梁者 灌湯煮其軀 千千悉斬首 萬萬不得留
興齋攝魔精 魍魎次次收 大道威嚴重 神風拂邪妖
鬼疫既消盡 萬民無災憂

西方

臣等謹為齋主某甲等 修建 洞淵三昧神咒大齋 行道禮懺
救疾消厄 滅禍除凶 伏惟 五帝神尊 少陰眾聖 垂慈巨澤 哀
鑒懇祈 願遣九天大兵 赤殺力士 收除信陵 赤烏魍魎 生死之
神 塚墓之鬼 烏奴留子等徒 並乞截斷凶殃 辟除瘟瘴 降下靈
液 灌注三田 四大輕強 更增年算 祿位遷永 速赴台衡 先亡
祖曾 俱超靜域 得如所願 仰荷玄恩

咒曰

西方薄收神 號曰為勾尼 三光玄太虛 朗朗超四維
八音三十二 百邪氣自摧 今日建福田 神咒破鬼儕
然燈光遠照 長夜朗然開 風止雨亦休 斬妖束奸非
敢有干逆鬼 縛送地獄畿 金刀縱橫截 鐵杖歷亂槌
行道除百惡 燒香滅千災 道士心精專 積善起死骸
萬邪畏真正 伏慝無敢違 奉師尊大道 道氣自來歸
愚人不能學 智者常依依 不惜財貨身 貴教乘空飛

北方

臣等謹為齋主某甲等 修建 洞淵三昧神咒大齋 轉經行道

太上洞淵三昧神咒齋十方懺儀

清微藏書閣

救治災疾 請福祛魔 伏願 五氣神君 北方真聖 敕下勒宋文昌
等眾風雨將軍 四天大王 齊心併力 收除青真大魔弗旦連子 門
戶井灶之鬼 丞伯阿倫 丁寧子都等為祟之神 一切消除 清蕩內
外 使齋主等 疾患痊復 四大輕強 安定精神 增延福壽 先亡
滯魄 各獲清昇 合宅咸康 吉無不利 得如所願 仰荷玄恩

咒曰

北方鬱單境 帝神曰玄冥 落落四運開 昭昭五氣明
豁豁邪穢除 蕩蕩天地清 太上威嚴切 凶鬼死不生
敢有違逆者 收之付天丁 千千皆截首 萬萬悉斬形
閻羅剪邪妖 北斗滅魔精 神風掃不祥 萬惡不敢停
上聖惠澤流 萬物普咸榮

中央

臣等謹為齋主某甲等 修建 洞淵三昧神咒大齋 行道禮懺
救治災疾 驅斥魔瘟 願敕十方天下 三十六天力士 覆護齋主
滅祟消凶 收除客死雲中 李子敖凶殃之鬼 六畜人形 五木百媚
蠻夷戎老羗虜 山上水中火內 射公萬種等鬼 一切消滅 當願

齋主 千罪萬咎 悉乞赦除 厄患潛消 衰危過免 千齡保祚 祿位遷升 七祖九玄 咸登妙果 得如所願 仰荷玄恩

中央戊己神 黃帝統萬機 三秦總八方 勾陳耀天暉
天輝光照灼 豁然幽夜開 至道恩慈普 萬兆悉歸依
今日建大齋 萬惡不敢希 風停不動條 福德高巍巍
鬼疫敢不忌 億億斬無遺 百姓遭疾苦 若請神咒齋
病者即蒙差 鬼氣自崩摧 諸天攝魔靈 眾真斬邪非
太上金口敕 不從死怨誰 若能伏道教 止惡勿行非

東北方

臣等謹為齋主某甲等 修建 洞淵三昧神咒大齋 轉經行道 救禳災疾 請福祈恩 願遣五方靈童 收斬五精 七吹賈元黃奴兄弟所行萬病 一切災殃 願攝鬼兵 驅除崇害冀得疾患痊愈 體健身康 更續年齡 遷騰祿位 闔門受慶 良賤蒙安 七祖清昇 九玄解脫 得如所願 仰荷玄恩

咒曰

太上洞淵三昧神咒齋十方懺儀

清微藏書閣

東北艮之子 其神御陰節 奉承太上教 善惡令分別
邪訛不干真 犯者宜誅殺 上聖護生民 侵者加大罰
洞淵理清肅 三昧法嚴切 神咒滅邪魔 邪魔並消滅
除凶凶即止 斬鬼鬼即絕 神兵闔天下 靈風掃地發
百福千方起 千災九陰沒 公私無障惱 存亡蒙濟拔

東南方

臣等謹為齋主某甲等 修建 洞淵三昧神咒大齋 行道禮懺 願遣赤卒小吏 太上真騎 收除百龍王翦等 所行災疾 驅遣下兵 俱蒙斷截 使齋主清蕩六府 流潤百關 疾患蠲除 衰厄殄滅 保安祿位 增續年齡 拔度幽魂 匡持見在 得如所願 仰荷玄恩

咒曰

東南巽之神 地戶張網羅 網羅布天下 百鬼不得過
五嶽為安靜 四海不騰波 萬邪不敢動 禁敕一切魔
魔鬼敢逆近 斬之付陀羅 頭破數千片 身形悉滅磨
護救生民苦 災厄自免過 三官伏威令 依如女青科

西南方

臣等謹為齋主某甲等 修建 洞淵三昧神咒大齋 解禳災疾
行道禮懺 願遣九天主者 三元力士 主收天下崇害妖祥 山林水
火風土大鬼 憂連文慶子等徒 乞斥去千里 遠出他方 原赦齋主
過往之愆 蠲除見在諸疾 使魂清氣爽 厄運蕩消 四大康和
六府通潤 鬼氣蕩滌 魔精殄除 福壽增饒 祿位遐永 心得如所
願 仰荷玄恩

咒曰

西南坤之母 神制收邪精 禁止天地鬼 瘟毒不得行
若有不從者 金刀斬汝形 今日建大齋 拔死而理生
三光一流照 九幽並開明 明朗遍十方 百鬼無藏形
故為病不止 收之付七星 神風掃凶邪 邪惡自然平
老君明旨教 急急如律令

西北方

臣等謹為齋主某甲等 修建 洞淵三昧神咒大齋 行道禮懺
思神念真 祈恩請福 願遣健兵力士 驅除王鳳白起所領災凶 應
時殄滅 不得容恕 當使齋主 神安魄定 靈藥灌心 疾患日痊 算

太上洞淵三昧神咒齋十方懺儀

清微藏書閣

壽增續 祿位惟永 早列台階 七祖九玄 俱登妙樂 得如所願

仰荷玄恩

咒曰

西北乾之父 其神通天光 聖帝愍民人 百鬼之剋傷
故結於天羅 布遍於十方 捕瘟收疫鬼 無一得隱藏
次次斬殺鬼 付之沸鑊湯 一切令滅盡 無復得逃亡
今日立功德 福流殄禍殃 病者得痊差 未則保休康
居宅悉清穩 鬼氣盡消亡 天神咸擁護 闔門永吉昌

上方

臣等謹為齋主某甲等 修建 洞淵三昧神咒大齋 愈病消災
功德行道 願遣黃英力士 正一使者 除遣女盆子赤首大魔 請自
攝邪精 應時蠲滅 使齋主凶殃雨散 厄障雲消 六府恬和 百關
調暢 算壽增益 祿位長安 七祖遷昇 九玄蒙慶 得如所願 仰
荷玄恩

咒曰

上方諸天帝 出入大羅門 廕育地上民 劫運使長年

下邪敢不亡 縱毒殺萬民 狼藉死病苦 怨聲徹上天
天上下大兵 擲火收百瘟 三五斷邪徑 七星塞鬼門
掩縛付天獄 萬民得完全

下方
臣等謹為齋主某甲等 修建 洞淵三昧神咒大齋 行道禮懺
歸命眾尊 願遣大明監邪 迴煞使者 各持鐵騎 收捕邪精 當使
齋主 疾病輕除 神安魄定 災運蕩滅 壽算增延 寵祿長承 台
階速踐 得如所願 仰荷玄恩

咒曰
下方地祇靈 紀綱都九域 清澄於四海 安鎮於五嶽
制攝邪魔鬼 不得行百毒 上聖護生民 故下盟威敕
若有違逆者 收之付天嶽 鐵鉤鉤鬼眼 金刀截手足
神咒殺百邪 百邪滅種族 萬民感道恩 無復哀悲哭
免度凶忌年 會見世安樂

太上洞淵三昧神咒齋十方懺儀竟

太上洞淵三昧神咒齋十方懺儀

清微藏書閣

天運壬辰年巳月正一天師清微弟子洪鼎堅羅大英恭錄彙編

李艦複校